

समे — 12:25

<><><><><><>

Parliament Session

बरोधी धड़े दे सांसदे अज्ज इक प्रमुख कारोबारी समूह दे खलाफ कथित गुज्जखोरी दे आरोपे दे मुद्दे पर संसद भवन च बरोध मार्च कड्डेआ। लोकसभा च बरोधी धड़े दे नेता राहुल गांधी, कांग्रेस दे होरनें सांसदे दे कन्नो-कन्नी डीएमके, आरजेडी ते होरनें पार्टिएं दे नेता बी बरोध प्रदर्शन च शामिल होए। नारे लां दे होई ओह मामले दी जांच संसद दी सांझी समिति थमां करोआने दी मंग करै करदे हे। तोआई, केंद्री मंत्री गिरिराज सिंह होरें संसद भवन च विपक्ष दे बरोध प्रदर्शन गी लेइयै संसद दे बाहर मीडिया कन्नै गल्लबात करदे होई इसी नाटक करार दित्ता। बीजेपी दे सांसद सुधांशु त्रिवेदी हुंदे आसेआ विदेशी सरजिमीं थमां भारत दे राश्ट्री हितें पर कीते जा करदे हमलें दा मुद्दा पुट्टेआ जेहदे परैन्त बरोधी सदस्यें हंगामा शुरू करी दित्ता ते राज्यसभा दी कार्यवाही दपैहरी 12 बजे तगर लेई स्थगित करनी पेई गेई। शून्यकाल दे दरान जेल्ले श्री त्रिवेदी होरें एह मुद्दा पुट्टेया तां सभापति जगदीप धनखड़ होरें आखेआ जे एह गंभीर मामला ऐ ते उनें'गी तय समें थमां मते चिरे तगर बोलने दी इजाजत दित्ती। विपक्षी सदस्यें इस फैसले पर ऐतराज जताया। सभापति होरें विपक्षी सदस्यें गी जकीन दोआया जे उनें'गी बी इस मुद्दे पर बोलने दी इजाजत दित्ती जाह्ग पर बरोधी धड़े दे हंगामे दे चलदे सभापति होरें सदन दी कार्यवाही दपैहरी 12 बजे तगर लेई स्थगित करी दित्ती।

<><><><><><>

ISRO Proba Launch

भारती अंतरिक्ष अनुसंधान संगठन — इसरो नै सैटेलाइट च आई दी तकनीकी खराबी करी यूरोपी अंतरिक्ष अर्जेसी दे प्रोबा-3 अंतरिक्ष यान दे प्रक्षेपण दे समें च बदलाव कीता ऐ। हून एहदा प्रक्षेपण श्री हरि कोटा दे सतीश धवन अंतरिक्ष केन्द्र थमां पीएसएलवी सी-59 दे राहें अज्ज संजा 4 बज्जियै 12एं मिटें पर कीता जाह्ग। एहदे थमां पैहले एहदा प्रक्षेपण कल संझां 4 बज्जियै 8एं मिटे पर कीता जाना तैह हा। दुनिया च अपनी चाल्ली दे पैहले प्रोबा-3 च 2

सैटेलाइट गी इक—दुए दे उप्पर रक्खियै किट्ठे लांच कीता जाहग ते ओह अंतरिक्ष च पुज्जियै इक—दुए कोला बक्ख होई जाडन।

<><><><><><>

Oamr PDD Meet

मुख्यमंत्री ओमर अब्दुल्ला होरें बिजली विकास विभाग गी बिजली दी कटौती च कमी करने लेई आखेआ ऐ। कल जम्मू दे सिविल सचिवालय च बिजली विकास विभाग दी इक बैठक दी प्रधानता करदे होई ओमर होरें मुतलका मैहकमे आसेआ ठंडु दी रूतै लेई कीती दियें तैयारियें दा जायजा लैता। बैठक च बिजली दी सप्लाई सरबंधी चुनौतियें, बिजली दी कटौती आहले कार्यक्रमें, राजस्व ते बड़ी मती ठंडु दरान बिजली खेत्तर दे कम्में—कारवाइएँ च सुधार करने सरबंधी मुद्दे उप्पर तफसीली चर्चा कीती गई। मुख्यमंत्री होरें इस दरान बक्ख—बक्ख कम्में ते परियोजनाएं दी ठोस ते माली प्रगति दा जायजा लैता। इस दौरान केंद्र सरकार आसेआ चलाई जा करदी योजनाएं ते प्रधानमंत्री विकास पैकेज दा बी जायजा लैता गेआ।

<><><><><><>

Doda-OGW Arrest

डोडा जिले च जन सुरक्षा कनून — पीएसए दे तैहत् आतंकवादी गुट शा बाहर रेइयै ओहदे लेई कम्म करने आले इक ओवर ग्राउंड वर्कर गी सुरक्षाबलें गिरफ्तार कीता ऐ। भगवाह तैहसील दे कनहाल बजारनी ग्रांड दा रौहने आला मोहम्मद इरफान नांड दा एह ओवर ग्राउंड वर्कर गैर कनूनी गतिविधिएं च मुलव्वस हा ते पाकिस्तान च बैठे दे अपने आकाएं दे इशारे पर जिले च आतंकवाद दी अगग फही भड़काने दी कोशश करा करदा हा। खित्ते च शांति ते सुरक्षा बरकरार रखने लेई उसी हिरासत च लैता गेआ हा।

<><><><><><>

Kishtwar Accident

किश्तवाड़ जिले दे डंगदूर इलाके च कल इक गड्डी शिड़के शा रूलकियै हेठ इक छूंहगी खड्डे च जाई डिगी जिस करी 2 लोकें दी मौत ते 14 जनें जख्मी होई गे। आकाशवाणी दे जम्मू संवाददाता दी रिपोर्ट मूजब, जेके 17—6576 नम्बरै आहली एह कड्डी जेरे तामीर बिजली

प्रोजेक्ट कंपनी दे मलाजमें गी लेइयै जा करदी ही जिसलै डरैवर दा गड़डी पर काबू नेई रेहा ते ओह हादसे दा शिकार होई गई। हादसे दे तुरत मगरा मकामी लोकें ते पुलस नै बचाह अभियान शुरू करी दित्ता हादसे च 2 लोकें दी मौके पर गै मौत होई गई ते जखमी होए दे 14एं जनें गी अस्पताल च दाखल करोआया गेआ ऐ। केन्द्री मंत्री डॉ. जितेन्द्र सिंह होरें हादसे दे मगरा किशतवाड़ दे डिप्टी कमीशनर राजेश कुमार शवन हुंदे'नै गल्ल कीती ते मंदे भामें आहले इस हादसे पर दुख जताया ते एह भरोसा बी दित्ता जे इस सरबंधै च हर मुमकन मदाद पक्क गै उपलब्ध करोआई जाहग।

<><><><><><>

JK-Katra Ban

रियासी जिले च कटरा दे एसडीएम होरें अपने अख्तियारें दा इस्तेमाल करदे होई धर्म नगरी कटरा ते एहदे कन्नै लगदे इलाकें च शराब ते अंडे ते हर चाल्ली दे मीट दी बिक्री ते उसी खाने पर पूरी चाल्ली पाबंदी लाई दित्ती ऐ। आकाशवाणी दे जम्मू संवाददाता दी रिपोर्ट मूजब, एह बंदिशां कटरा थमां लेइयै पवित्तर गुफा तोहड़ी दे पूरे रस्ते ते एहदे दौने बक्खी 2 किलोमीटर दे दायरे अंदर औने आहले इलाकें च बी लागू होउन।

<><><><><><>

RNU Annoncement

आकाशवाणी दा क्षेत्रीय समाचार एकांश जम्मू कल 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश आसेआ केई सारे कार्यक्रमें दा आयोजन कीता जा करदा ऐ। स्थापना दिवस आले रोज यानि कल बड्डलै सांझे 9 बजे, 30एं मिटें दा इक विशेष कार्यक्रम प्रसारत कीता जाहग जेहदे च क्षेत्रीय समाचार एकांश दी भूमका, जिम्मेवारिएं ते कम्म करने दे तौर-तरीकें दे अलावा, इत्थे कम्म करी चुके दे अधिकारिएं कन्नै गल्लबात बी शामिल होग। एहदे अलावा कल संझा 7 बजे बी 15एं मिटें दा इक विशेष कार्यक्रम प्रसारत कीता जाहग जेड़ा इस मौके पर सहाड़े श्रोताएं ते जम्मू-कश्मीर दिएं नामवर हस्तिएं आसेआ भेजी जा'रदिएं शुभकामनाएं पर आधारित होग। अपने कर्मिएं दी हौसला-अफजाई लेई, ऐकती स्थापना दिवस दे मौके पर उनें'गी सम्मानित बी कीता जाहग जिंदे च 2024 ब'रे दे बेह्तरीन समाचार सम्पादक, डोगरी ते गोजरी दे बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मी दे सम्मान शामिल न। इस मौके पर 2024

आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैह्योग ते जोगदान देने आहलें गी बी सम्मानित कीता जाह्यग।

<><><><><><>

Junior-Asia Cup Hockey

भारत नै मर्दे दा जूनियर हॉकी एशिया कप जित्ती लैता ऐ। ओमान दे मस्कट च कल रातीं खेड्डे गेदे फाइनल च भारत नै रिवायती हरीफ पाकिस्तान गी 3 दे मकाबले 5 गोलें कन्नै हराई दित्ता। इस जित्त कन्नै गै भारत नै इस महाद्वीपीय टूर्नामेंट च 5मीं बारी खिताब अपने नां करी लैता। एह्दे शा पैहले भारत नै 2004, 2008, 2015 ते 2023 च एह् प्रतियोगिता जित्ती ही। भारत दी तरफा अरिजीत सिंह हुंदल नै 4 गोल कीते ते जित्त दे नायक रेह जिसलै कि दिलराज सिंह नै इक गोल कीता।

<><><><><><>